



# ILIDŽA

INFORMATIVNI BILTEN OPĆINE ILIDŽA





## 19. SJEDNICA OPĆINSKOG VIJEĆA ILIDŽA

### Usvojen Izvještaj o izvršenju Budžeta Općine Ilidža za period od 01.01. do 30.06.2014. godine

Općinsko vijeće Ilidža na 19. redovnoj sjednici, 31. jula 2014. godine u Multifunkcionalnoj sali usvojilo je Izvještaj o izvršenju budžeta Općine Ilidža za period 01.01. – 30.06.2014. Prema tom izvještaju ostvaren je prihod u uznosu od 59,39 posto od plana, tj. 17.816.448,45 KM u odnosu na 30 miliona kako je planirano. Najveći procenat ostvarenja Općina je imala od neporeznih prihoda (prihoda od redovne djelatnosti Općinskog organa, ostvareno je 57,09 posto u odnosu na planirano i prenesena sredstva od viška prihoda iz ranijih godina, 7.800.000 KM. Prihodi od poreza su ostvareni u procentu 42,01 posto od plana. Rashodi i izdaci su ostvareni u procentu 32,18 posto tj. 9.655.864,31 KM, a plan je 30 miliona KM. Izmirene su sve obaveze prema uposlenim zaključno sa šestim mjesecom, prema udruženjima građana, sportskim udruženjima, političkim partijama, izabranim zvaničnicima, komisijama, volonterima (75). Isplaćene su i stipendije talentovanim učenicima i studentima, socijalno ugroženim, djeci bez roditeljskog staranja, jednokratne novčane pomoći, bolesnim od težih oboljenja na osnovu odluka Resorne komisije. Izmirene

su obaveze prema dobavljačima za izvođenje radova, općinskim partnerima koji isporučuju robe i usluge, finansiranje manifestacija i značajnih datuma, vjerskih objekata, nabavku plastenika (uplaćen avans). Najznačajniji kapitalni projekti koji su rađeni u proteklom polugodišnjem periodu, na osnovu javnih nabavki još od prethodnog perioda nastavak saobraćajnice Ilidža-Hrasnica, izgradnja saobraćajnice od mosta Alije Izatbegovića do Ratnog mosta, asfaltiranje ulica po mjesnim zajednicama uz učešće građana, javna rasvjeta po mjesnim zajednicama, izgradnja sekundarne vodovodne mreže u Rakovici i Blažuju, izgradnja i rekonstrukcija kanalizacione mreže po mjesnim zajednicama uz učešće građana, čišćenje i uređenje vodotoka, izgradnja Sedme osnovne škole, izgradnja sportske plohe, rekonstrukcija autobusnog stajališta, sufinansiranje projekta „Azil za životinje“. U prvom polugodištu nabavljeno je i jedno terensko vozilo za potrebe civilne zaštite iz sredstava zaštite i spašavanja, koje je na terenu već bilo u vrijeme poplava i pokazalo se opravdanim, jer je bilo od velike pomoći građanima Ilidže.

### Donešene Odluke o pristupanju izradi RP Nova Ilidža 1, Nova Ilidža 2 i Nova Ilidža 3



Općinsko vijeće Ilidža na sjednici održanoj 31.jula 2014. godine donijelo je Odluku o pristupanju izradi Regulacionog plana „Nova Ilidža 1“. Općina Ilidža je inicirala izradu provedbenog planskog dokumenta Regulacionog plana „Nova Ilidža 1“, a u cilju omogućavanja realizacije izgradnje stambenih i poslovnih sadržaja sa parkovskim i rekreativnim površinama za koje Općina ima interes što bi ovaj prostor pretvorilo u modernu zonu. Sredstva za izradu Plana će obezbijediti Općina Ilidža u iznosu 31.800 KM iz Budžeta za 2014. i 2015. godinu. Nosilac pripreme je načelnik Općine, a izrade Plana je Zavod za planiranje razvoja Kantona Sarajevo. Izrada Plana se radi na osnovu inicijative Općinskog vijeća od 24. aprila 2014. pokrenute u cilju urbanizacije. Površina obuhvata je 42,3 ha. Općinsko vijeće, također je donijelo odluku o pristupanju izradi Regulaionog plana „Nova Ilidža 2“, površine prostornog obuhvata 23 ha i Regionalnog plana „Nova Ilidža 3“ obuhvata 53,7 ha. Taj projekat nudi samoodrživost, uređene parkove, šetnice, raznolikost sadržaja, nove kvalitete stanovanja, regionalne poslovne centre i luksuzne smještajne kapacitete. To je historijski projekat ne samo za Ilidžu već za cijelu BiH.



## Vijeće donijelo Odluku o pristupanju izradi urbanističkog projekta “Riverina-sastavci-Faza A”

Općinsko vijeće Ilidža je na posljednjoj sjednici donijelo odluku o pristupanju izradi urbanističkog projekta “Riverina-Sastavci –Faza 1 A”. Okvirna sredstva za pripremu podloga i izradu Plana u iznosu 21.500 KM obezbijedit će Općina Ilidža putem krajnjeg investitora “MBI DEVELOPMENT”. Načelnik Općine Ilidža u svojstvu nosioca pripreme donio je program i plan aktivnosti za izradu Urbanističkog projekta “Riverina –sastavci” Faza 1 A. Površina obuhvata je 1,77 ha.

## Muhamed Omerović novi predsjedavajući Općinskog vijeća Ilidža

Na prijedlog vijećnika stranaka parlamentarne većine, na 19. sjednici Općinskog vijeća, smijenjena je dosadašnja predsjedavajuća Općinskog vijeća Ilidža Smiljana dr. Viteškić. Na sjednici je formirana Komisija za smjenu i imenovanje predsjedavajućeg i dopredsjedavajućeg koja je predložila nove kandidate koji su tajnim glasanjem izabrani na nove funkcije. Iz Napredne demokratske stranke na

funkciju predsjedavajućeg Općinskog vijeća Ilidža predložili su vijećnika Gorana Kapora, koji je odbio prijedlog za ovu funkciju. Nakon smjene dr. Viteškić na funkciju predsjedavajućeg izabran Muhamed Omerović, do sada prvi dopredsjedavajući, dok je na njegovo mjesto izabran Amir Džino, vijećnik Napredne demokratske stranke. Drugi dopredsjedavajući Općinskog vijeća Ilidža nije mijenjan.

## Edin Hošić položio zakletvu

Dosadašnji vijećnik Fikret Prevljak (SDA), zbog pravila stranke iz koje dolazi jer je kandidat na listi za Skupštinu Kantona Sarajevo, predao je svoj mandat slijedećem kandidatu na listi Edinu Hošiću. Na posljednjoj sjednici Edin Hošić je položio svečanu zakletvu i postao novi vijećnik Općinskog vijeća Ilidža.





## Uskoro projekat "Nova Ilidža"

Općinsko vijeće je na 19 sjednici usvojilo Prijedlog odluke o pristupanju izradi Regulacionog plana „Nova Ilidža 1“, „Nova Ilidža 2“ i „Nova Ilidža 3“. Projekat Nova Ilidža je od historijskog značaja za općinu i šire. Moderno naselje za 40 hiljada stanovnika koje će se prostirati na desnoj obali rijeke Željeznice od Termalne rivijere do entitetske linije u Vojkovićima. Uređeni parkovi, šetnice, raznolikost sadržaja, nova kvaliteta stanovanja, regionalni poslovni centri i luksuzni smještajni kapacitet neki su od planiranih sadržaja. Vrijednost projekta je dvije milijarde KM za koje je zainteresovano više investitora. Urađen je idejni projekt, a Općinsko vijeće je dalo saglasnost za nastavak daljih aktivnosti.

Ilustracija



## Izgrađeno pet igrališta na području Općine Ilidža

Općina Ilidža je za izgradnju 11 igrališta u 2014. godini izdvojila 100.000 KM, od toga osam novih i sanacije tri postojeća igrališta. Do sada je završeno pet igrališta u mjesnim zajednicama Hrasnica I, Hrasnica II, Stupsko brdo, Osjek i Sokolović Kolonija. Igrališta su opremljena metalnim mobilijarom što uključuje klackalice, ljuljačke sa penjalicom, tobogane, klupe i kante za otpatke. Trenutno je u fazi sanacija igrališta u centru Ilidže. U mjesnim zajednicama Stup II i Blažuj nisu počeli radovi zbog otpora građana oko izbora lokacija, što dodatno usporava realizaciju planiranih aktivnosti. Izvođač radova izgradnje igrališta je firma „Glovis“ d.o.o. iz Zenice.

## Finansijska pomoć Domu zdravlja Ilidža

Općina Ilidža i JU Dom zdravlja Kantona Sarajevo u prostorijama Općine Ilidža, 29. avgusta 2014. godine potpisali su Sporazum o namjenskom korištenju sredstava za sufinansiranje projekta rekonstrukcije elektroinstalacija u objektu Doma zdravlja Ilidža. Ovim Sporazumom Općina Ilidža je iz budžeta odobrila sredstva u iznosu od 100.000 KM za rekonstrukciju elektroinstalacija koje su dotrajale i predstavljaju opasnost da izazovu požar što bi imalo dalekosežne

posljedice za rad ove zdravstvene ustanove. Sporazum su potpisali općinski načelnik prof. dr. Senaid Memić i direktorica Doma zdravlja Kantona Sarajevo prim. dr. Dženana Tanović. „Općina kontinuirano vodi računa o zdravlju na Ilidži i finansijski ga podržava kako bi pružanje zdravstvenih usluga našim stanovnicima bilo što bolje. I u narednim godinama ćemo, u okviru naših mogućnosti, pomagati i ulagati u zdravlje na Ilidži“, kazao je u svom obraćanju načelnik Memić.



## Načelnik upriličio prijem za 20 šehidskih porodica

Povodom Ramazanskog bajrama u Općini Ilidža je 30. jula upriličen prijem i podjela jednokratnih novčanih pomoći u iznosu od po stotinu KM za dvadeset šehidskih porodica.

U ime Općine Ilidža šehidske porodice ugostio je načelnik prof. dr. Senaid Memić, koji je naglasio kako šehidske porodice ne treba nikad zaboraviti jer su njihove žrtve najveće i to zaslužuje veliko poštovanje. „Vi ste dali najvrijednije za našu domovinu. Vaše žrtve su najveće. Naša podrška vama je neupitna i mi ćemo i ubuduće nastaviti da organizujemo ove prijeme, da se vidimo, popričamo, pomognemo koliko možemo jedni drugima“ kazao je, između ostalog, načelnik Memić. Nura Musić je majka dva šehida Izeta i Ismeta. „Moja tuga je svakodnevna. Mnogo mi znači da nas je načelnik ugostio i da je sa nama porazgovarao. Znam da se kod njega uvijek može pokucati na vrata i da je za nas otvoreno i mnogo mi znači da se nas šehidskih porodica neko sjeti u ove dane Bajrama“, rekla je Nura Musić, majka dva šehida.

# Obilježene 22 godine od formiranja Četvrte viteške motorizovane brigade Ilidža

Polaganjem cvijeća na centralno spomen obilježje šehidima i poginulim borcima ispred zgrade Općine Ilidža i svečanom sjednicom Općinskog vijeća Ilidža, 24. jula otpočelo je obilježavanje 22 godine od formiranja Četvrte viteške brigade. Na svečanoj sjednici su prisustvovali pripadnici brigade, gosti, porodice šehida i poginulih boraca Četvrte viteške motorizovane brigade i brojni građani Ilidže. Predsjedavajuća Općinskog vijeća Ilidža Smiljana dr. Viteškić, predsjednik Udruženja Četvrta viteška motorizovana brigada Ilidža Emir Redžović i načelnik Općine Ilidža prof. dr. Senaid Memić obratili su se prisutnim na sjednici. "Kada bi se u ratu spomenulo ime Četvrte viteške brigade, kada se spomene i danas, asocijalo nas je i asocijira na nadljudsku hrabrost, poštenje, postojanost, odbranu, život..Život koji je tada da bi opstao na slobodnim ilidžanskim teritorijama trebao kompletnu infrastrukturu za odbranu i opstanak. Sve je urađeno, saobraćajnica Igmanski put, Tunel spasa, Ratna bolnica "Čamil Marić", ambulante, škole, kuhinje, pekare, šnajderi, osnovne i srednje škole, sve što je potrebno za odbranu a civilima da prežive. Naviru sjećanja ..Kako je počelo, kako smo sve to izdržali?," istakla je Smiljana Viteškić, predsjedavajuća Općinskog vijeća. Naglasila je kako je cilj svima kao i prvog dana osnivanja brigade, slobodna i perspektivna domovina i njeni građani. "Posebno sam ponosna što su svečane sjednice Općinskog vijeća povodom obilježavanja dana brigade krenule i postale tradicija. Iako sam žena, bila sam pripadnica Teritorijalne odbrane, borac 101. brigade i Četvrte viteške brigade. I danas mi je multietnička i slobodna BiH sveti cilj", izjavila je predsjedavajuća Viteškić. Emir Redžović, predsjednik Udruženja Četvrta viteška brigada evocirao je uspomene i poslao poruku da će borci ove brigade uvijek biti za cjelovitu i nedjeljivu državu, a i da šehidi i poginuli borci nikad neće biti zaboravljeni. „Četvrta viteška motorizovana brigada



nastala je iz naroda. Hrabri, poštenu i postojani ljudi su srcem goloruki, organizovali se po sokacima, ulicama, mjesnim zajednicama a potom štabovima. Uvažavajući multietničnost ovih prostora sastav brigade je u potpunosti odgovarao stvarnom stanju. Rame uz rame u našoj brigadi slobodne prostore općine Ilidža branili su i svoje živote dali za ovu domovinu Srbi, Hrvati, Bošnjaci i ostali. Historijski put brigade ispisan je hrabrošću, ranama, krvlju i životima boraca i naroda slobodnih ilidžanskih prostora. To je priča koja živi sa nama i koja je dio nas. Uspjeli smo da zajedno sa narodom Butmira, Sokolović- Kolonije i Hrasnice da opravdamo povjerenje Predsjedništva BiH i da odbranimo Igmanski put, da odbranimo kapije grada Sarajeva i BiH. Danas oružje šuti, ali vode se teške bitke svuda oko nas, danas se čuju ratne trube i danas je ugrožena BiH", istakao je u svom izlaganju predsjednik Udruženja Četvrta viteška motorizovana brigada Ilidža Emir Redžović. On je dodao da danas više nego ikad jedinstvo je neophodno. Načelnik Općine Ilidža prof. dr. Senaid Memić kazao je kako se svi moraju sjećati naše historije i obilježavanjem bitnih datuma boriti se protiv zaborava. „Broj prisutnih danas pokazuje da smo svjesniji nego ikad važnosti ovakvog obilježavanja. Trebamo graditi povjerenje među nama i jedino tako

ćemo uspjeti u nastojanju da živimo lijep i dostojanstven život. Iz historije moramo naučiti kako da pravimo bolje sutra. Ova brigada je spriječila

genocid u Sarajevu i nemojte nikad to zaboraviti", dodao je načelnik. U okviru obilježavanja 22 godine upriličeno je i niz drugih aktivnosti. Proučena je 25. jula hatma dova šehidima u džamijama u Hrasnici, Butmiru i Sokolović-Koloniji, a 28. jula položeno cvijeće na mjesto stradanja Emira Bogunića Čarlija, sestara Eličić i Džemala Bulbula na

Golom brdu, dok je u večernjim satima održana centralna manifestacija Bajramsko sijelo na glavnom trgu ispred Doma kulture u Hrasnici.



## Položeno cvijeće na Golom Brdu



U okviru obilježavanja godišnjice formiranja 4. Viteške motorizovane brigade 28.jula 2014. godine, što je ujedno bio i drugi dan Ramazanskog bajrama, zvaničnici, preživjeli saborci, porodice šehida, obišli su i položili cvijeće na mjesto stradanja Emira Bogunića - Čarlija, sestara Semire i Mevlide Elčić i Džemala Bulbula na Golom Brdu.



## Obilježena 22. godišnjica „Bitke za Famos“

U naselju Hrasnici 04. augusta 1992. godine vodila se bitka za fabriku "Famos" i naselja smještena uz nju. U toj bici poginula su 27, a ranjeno je više pripadnika Četvrtе viteške motorizovane brigade, uglavnom mladih ljudi. Neki od ranjenih branitelja su ostali teški invalidi. U Hrasnici, kod spomen-obilježja u naselju Lasica, svake godine obilježava se godišnjica bitke za Famos. I ove godine, 4. augusta u organizaciji Općine Ilidža i Organizacije porodica šehida i poginulih boraca okupljeni su obilježili dvadesetu godišnjicu „Bitke na Famosu“. „Na današnji dan teško je govoriti jer je svaka riječ teška poput olova i gubi svrhu dok stojimo ispred ovih uklesanih imena. Bez izbora da li je prošlo deset, dvadeset godina, bol koju nosimo i koju danas djelimo uvijek će biti prisutna. Naša je obaveza danas da oživimo sjećanje i ponosno kažemo da smo odbranili našu teritoriju. Ne smijemo odustati nikad od vrijednosti za koje su se oni borili. Naša brigada vodi

računa koliko je moguće o ovim porodicama. Obišli smo porodice za Ramazan, a imali smo i jedan zajednički iftar što praktikujemo svake godine. Možda to nije dovoljno ali činimo šta možemo. Nastojimo da ne zaboravimo“, kazao je ratni komandant Četvrtе viteške brigade, general Fikret Prevljak. Delegacije su položile cvijeće ispred spomen ploče u Lasici-Hrasnici, a potom na spomen obilježju ispred Doma kulture u Hrasnici. Na mezarju Kovači-Hrasnica proučen je Jasin i položeno cvijeće, a proučen je i tevhid u Lasičkoj džamiji. Preživjeli učesnici bitke za Famos, kao i članovi porodica poginulih, kazali su nam da je to bila jedna od najtežih bitaka za odbranu Bosne i Hercegovine i Sarajeva, ističući da su hrabri borci onemogućili ulazak na slobodnu i ilidžansku teritoriju. „Ne smijemo odustati od vrijednosti za koju su se borili borci Armije BiH. Zbog žrtve onih čija su imena uklesana ne smije se odustati od onoga zašto su se borili. Moramo misliti na jedinstvo, naći zajedničku snagu kao i oni koji su je u protekloj agresiji hrabro branili. Naše oružje treba biti znanje, naši borci trebaju biti mladi inženjeri i naučnici. Samo tako će se bar donekle moći otplatiti dug šehidima“, poručeno je na ovom skupu u Hrasnici. U napadu 1992. godine živote su dali: Ferid Kahvić - Ferkonja, Safet Toković - Poštar, Nihad Merdžanić - Zecko, Ibrahim Memić - Turbo, Asim Bašić - Drica, Nedžad Ibrahimović - Nečko, Mirsad Bećirović - Mica, Mustafa Isanović, Jasminko Pamuk, Murat Letić, Ibrahim Handžić, Mušan Džemidžić, Vahidin Kapo, Silvio Ivanić, Ferid Kicara, Muhidin Vatrić, Mehmed Anđelija, Senad Gušić, Esad Salihović, Almir Avdić, Enes Alić, Miralem Hrnjica, Zorica Lerotić, Mehmed Džaltur, Bećir Muhić, Amir Bećirović i Mahir Delić.

## Obilježena 22. godišnjica stradanja djece u parku u Hrasnici

U parku u Hrasnici u organizaciji Udruženja logoraša Ilidža, 12. jula 2014. godine, roditelji, rodbina, prijatelji, vršnjaci, delegacije Općine Ilidža, udruženja roditelja ubijene djece opkoljenog Sarajeva 1992-1995. godina, logoraša općine Ilidža i Saveza logoraša BiH, polaganjem cvijeća ispred spomen obilježja, učenjem Fatihe, minutom šutnje odali su počast ubijenoj

djeci. Prije 22 godinu 12. jula 1992. godine, tačno u 14,50 sati, granata ispaljena sa agresorskih položaja iz pravca Vojkovića usmrtila je četvoro nevinih mališana u parku u Hrasnici. Tog dana zauvijek su prestala da kucaju srca nevinih mališana Azmira Bradarac, Sanele Hadžiomerović, Aldnine i Admira Čolpe. „Teško je govoriti na ovom mjestu i ovakvim tužnim povodom kako bismo sačuvali sjećanje



na ovu djecu koja su u rijetkim trenutcima igre zvjerski ubijena. Zato vas molim da se svake godine okupljamo na ovaj dan kako bi se sjetili ovog tragičnog događaja,“

kazao je u svom obraćanju prisutnima načelnik općine Ilidža prof. dr. Senaid Memić. Prigodan program izvela su djeca iz vrtića „Radost“ iz Hrasnice.

## Podijeljeni paketi za socijalno ugrožene članove

Udruženje logoraša općine Ilidža, 15. jula 2014. godine u prostorijama udruženja organizovalo je akciju pomoći svojim članovima. Ovom prilikom podjeljeno je 100 paketa sa prehrambenim artiklima za socijalno ugrožene članove udruženja, a u povodu mjeseca ramazana. Paketi su vrijednosti oko 50 KM, a donirala ih je Svjetska asocijacija muslimanske omladine Wamy-Nedva. Ovo je još jedna od uspješnih akcija ovog udruženja.



## Općina Ilidža donirala pakete sa higijenskim potrepštinama

### Ramazanski paketi za članove Udruženja logoraša

Povodom mjeseca Ramazana i predstojećeg bajrama u okviru programa socijalne zaštite, Udruženje logoraša Ilidža, 25. jula 2014. godine u prostorijama udruženja upriličilo je podjelu paketa sa prehrambenim proizvodima za svoje socijalno ugrožene članove. Pakete sa hranom u vrijednosti od 50 KM dobilo je 65 članova, a donirale su ih humanitarne organizacije „HUMAN APEL INTERNACIONAL“ 50 paketa i „SUŠA-

POMOĆ“ 10 paketa. „Na području općine Ilidža ima 773 registrovana logoraša i oni su najugroženija kategorija stanovništva koja nije obuhvaćena nijednim zakonom, koja nema riješen socijalno pravni status počev od zapošljavanja, socijalne zaštite pa do zdravstvenog osiguranja. Ova i bilo kakva pomoć im je dobro došla jer je trećina njih na rubu egzistencije“, kazao je Enes Dželilović predsjednik Udruženja logoraša Ilidža.

Općina Ilidža je 14. avgusta 2014. godine donirala sredstva za održavanje higijene za sve osnovne i srednje škole te vrtić, sa područja ove općine. Nabavka sredstava je izvršena u 11 osnovnih i dvije srednje škole, kao i u vrtiću „Radost“ Hrasnica. Paketi koji se sastoje od dvadesetak različitih proizvoda za održavanje higijene, pomoći će i omogućiti nesmetane uslove za rad ovih odgojno-obrazovnih ustanova. Vrijednost nabavke za svih 14 subjekata je oko 8.000 KM.



# Sa Ilidže krenuo Marš mira 2014. Srebrenica



U Multifunkcionalnoj sali Općine Ilidža, 07. jula 2014. godine u 09,30 sati, upriličen je prijem za učesnike Marša mira 2014. godine. Već petu godinu zaredom Općina u saradnji sa Gorskom službom spašavanja Ilidža organizuje Marš mira kako bi odali počast

stradalim u genocidu 11. jula 1995. godine u Srebrenici. U ovaj poduhvat je krenulo više od 70 učesnika koje sačinjavaju članovi Gorske službe spašavanja Ilidža, pripadnici specijalne jedinice „Crni labudovi” i grupa zainteresovanih građana Ilidže. „Bez podrške koju je omogućila Općina Ilidža, i ove kao i prethodnih godina, ne bi smo bili u mogućnosti da organizujemo odlazak na Marš mira. U Nevzuku nas već očekuju šatori, hrana i sanitet, nakon čega nastavljamo sa tri rute koje će biti duge 38, 32 i 46 kilometara do Potočara”, kazao nam je predsjednik Gorske službe spašavanja Ilidža i komandant Marša mira Salem Bilalović. Tokom trodnevnog pješaćenja, posjetit će lokacije masovnih grobnica i evocirati uspomene na stradanje Bošnjaka. „Vi koji idete svjesni ste razloga koji su doveli do toga da se ovo mora obilježavati. Vidite da vrijeme mijenja ono što se dogodilo i trebamo činiti sve da se stradanje ljudi ne zaboravi i ne ponovi”, istakao je načelnik prof. dr. Senaid Memić, poželivši sretan put svim učesnicima Marša mira 2014.

## Podijeljeno 100 paketa

Zahvaljujući dobroj saradnji načelnika prof. dr. Senaida Memića i Rahma International Kuwait-Udruženja za blagostanje, uručeno je 100 paketa za demobilisane borce i socijalno ugrožene. Podjelu paketa je organizovala Prva samostalna brigada 3. jula 2014 u prostorijama Mjesne zajednice Stup II. „Hvala dobrim ljudima na pomoći, nemam nikakva primanja i svaka pomoć mi je dobrodošla”, kazala je Izeta Kavazić. „Ramazanski paketi u kojima se nalaze prehrambeni artikli bar donekle će olakšati dane posta ovim ljudima. Hvala načelniku i Rahma International Kuwait udruženju”, rekao je Faik Višić, predstavnik Udruženja Prva samostalna brigada.



## Dodijeljeno još sedam plastenika

Općinski načelnik donio je odluku da se odobrava dodjela plastenika površine 100 kvadratnih metara sa dodatnom opremom za još sedam kandidata. Plastenike su dobili : Ramiza Mujčić, Javna ustanova Terapijska zajednica Kantona Sarajevo "Kampus", Vejsil Hukara, Hajrudin Kiverić, Hajrudin Begić, Hidajeta Pašić i Enisa Šadinlija.

# Treći moto maraton Srebrenica 2014.

„Da se ne zaboravi i ne ponovi” moto je Trećeg internacionalnog maratona koji je posvećen godišnjici tragedije u Srebrenici. Učešće je uzelo oko 130 motorista iz Švedske, Slovenije, Hrvatske, Austrije, Švicarske i Bosne i Hercegovine, koji su se 10. jula 2014. godine okupili na parking u ispred Energoinvesta na Ilidži gdje je obavljeno akreditovanje učesnika i podjela majica. Nakon toga su u pratnji policije krenuli na defile kroz grad te se zaustavili na spomen-obilježju poginulog

djeci Sarajeva gdje su položili cvijeće i nastavili put prema Potočarima. Organizatori su Moto klub „Jahači iz predgrađa” sa Ilidže i Moto klub policajaca „Zvonko” iz Bihaća. Općina Ilidža je kao i prethodnih godina podržala ovaj projekat i za sve učesnike obezbijedila majice sa natpisima. „Maraton organizujemo da podsjećamo svijet na zločin koji se desio u Srebrenici, da se više nikada i nikome ne ponovi”, kazao nam je Dino Ramusović, član Organizacionog odbora maratona.



## Najljepše uređeno dvorište ima Halil Čulov, a balkon Hadija Skalonjić



Načelnik Općine Ilidža prof. dr. Senaid Memić i predsjedavajuća Općinskog vijeća Smiljana dr. Viteškić u sali Općine 30. jula upriličili su prijem i uručili nagrade pobjednicima konkursa za najljepše dvorište i najljepši uređen balkon. Riječ je o konkursu kojeg Općina Ilidža organizuje već četvrtu godinu. Prema ocjeni stručne komisije najljepše uređeno dvorište ima Halil Čulov i nagrađen je novčanim iznosom od 500 KM. Drugo mjesto pripalo je Muji Lokvančiću koji je nagrađen sa 400 KM, a trećeplasirana je Zinajda Softić Al Husin, kojoj je pripala nagrada u iznosu od 300 KM. Nagradu za najljepše uređeni balkon osvojila je Hadija Skalonjić, koja je dobila 300 KM, druga je Mejra Fajić, 200 KM, a treća Bedija Mehić 100 KM. Načelnik je čestitao nagrađenim, zahvalio im na tome što uređenjem svog dvorišta doprinose ljepšem izgledu Ilidže i poželio im puno uspjeha u narednom periodu, kao i da sljedeće godine na ovom, ali i nekom drugom konkursu, osvoje neke od nagrada. Poručio je da će Općina Ilidža još više ulagati u hortikulturu ali i podsticati mlade generacije da vole biljke, jer na taj način mogu shvatiti važnost uređenja svoje okoline.



# Asfaltirane ulice Kakrinjski put i Braće Bučan

Na području mjesne zajednice Rakovica asfaltirana je ulica Kakrinjski put u dužini od 450 metara. Asfaltirana je i ulica Braće Bučan u mjesnoj zajednici Sokolović Kolonija u dužini od 235 metara, a ukupna vrijednost završenih radova u ove dvije ulice je 105.000 KM. U toku su radovi u ulicama Jana Doršnera – MZ Stup u dužini od 400 metara, Ibrahima Ljubovića – MZ Ilidža centar u dužini od 35 metara, Hendekuša – MZ Osjek u dužini od 520 metara i Krste Hegedušića – MZ Lužani dužine od 340 metara za koje je Općina Ilidža je izdvojila 177.000 KM.



# Asfaltirano devet ulica



Na području općine Ilidža završeno je asfaltiranje ulica Ruževik, Blatuša, Senada Fazlića, Kasindolske i Bojničke. Stanovnici ulice Senada Fazlića u MZ Otes dobili su asfalt u dužini 895 metara. Izvođač radova je bila firma "Orman" d.o.o., a vrijednost 88.000 KM. Investitor je Općina Ilidža u saradnji sa građanima. Ulicu Ruževik u MZ Hrasnica

II asfaltirana je u dužini 120 metara, a radove je izvodila firma "Sarajevo putevi" d.d. u vrijednosti 12.000 KM, koje je finansirala Općina Ilidža. Ulica Blatuša u MZ Stup asfaltirana je u dužini od 115 metara i vrijednosti 10.000 KM, a finansijer je Općina Ilidža uz učešće građana. Posao je završila firma "Orman" d.o.o. U MZ Stup asfaltirana je i ulica Bojnička u dužini od 120 metara. Vrijednost radova je 11.000 KM, a izvođač je firma "Orman" d.o.o. I u MZ Stup II izvršena je rekonstrukcija Kasindolske ulice u dužini od 290 metara. Investitor u iznosu 24.700 KM je Općina Ilidža i građani, a izvođač radova je bila firma KJKP "Rad" d.o.o. U MZ Blažuj asfaltirana je ulica Vidovci u dužini 540 metara. Vrijednost radova je 55.000 KM, a finansijer je Općina Ilidža i građani, dok su izvođači "Sarajevoputevi" d.d. Također, završeno je asfaltiranje, odnosno rekonstrukcija dijela Kasindolske ulice u dužini 170 metara. Vrijednost radova je 16.000 KM, a izvođač je "Mevludin Comerc" d.o.o. Investitor je Općina Ilidža i građani. Rekonstruirana je i ulica Lasičke megare u Hrasnici I. Dužina je 46 metara, a izvođač je "Sarajevoputevi" d.d., dok je Općina finansijer u iznosu 5.000 KM, kao i asfaltiranje u MZ Otes ulice Terovića u dužini 345 metara. Investitor je Općina Ilidža i građani, a vrijednost 30.000 KM, a posao je povjeren firmi "Orman" d.o.o.

# Završeno deminiranje u Rakovici Vela II

U Mjesnoj zajednici Rakovica 01. avgusta 2014. završen je projekat deminiranja Vela II površine 8.7654 metara kvadratnih. Vrijednost projekta je oko 140.000 KM. Pronađen je i uklonjen veći broj neeksplozivnih ubojitih sredstava. Finansijska sredstva za ovaj projekat je obezbijedila Općina Ilidža i EU, a izvođač radova je UEM Sarajevo (Udruženje za eliminaciju mina).



## Obilježene 73 godine od Ustanka naroda i narodnosti BiH

U Velikom parku kod Spomen kosturnice i Šaminom gaju kod Spomen grobnice, uz prisustvo predstavnika UABNOR-a Hadžići, Vogošća, Stari Grad, Konjic te predstavnika zakonodavne i izvršne vlasti, boračkih Udruženja 92-95, izviđača, predstavnika političkih partija i stranaka, simpatizera i građana antifašista, položeno je cvijeće i odato je dužno poštovanje borcima NOR-a koji su ostavili živote u borbama protiv fašista. Predsjednik Skupštine udruženja i učesnik NOR-a Stevo Kuljanin istakao je značaj ustanka, tekovina NOR-a, te posebno naglasio potrebu da se ovom datumu posveti velika pažnja. "Posebnu pažnju treba posvetiti mladim generacijama, rođenim poslije 1990. godine, kako bi oni dobili što više pravih i konkretnih informacija o značaju i važnosti ovog dana", naglasio je Kuljanin.



## Susret djece Kladnja i Požege na Ilidži

Općina Ilidža domaćin je 100-tinjak djece iz Kladnja i Požege koji su dio projekta „Susret djece Bosne i Hercegovine i Srbije” pod motom “Budimo povezani vezom ljubavi”. Osnovci su bili gosti Ilidže tri dana, a cilj projekta je da se prevladavaju ratne posljedice i potakne proces uspostave povjerenja među pripadnicima različitih etničkih skupina, kao priprema za budući život u ujedinjenoj multikulturalnoj Europi. Domaćini manifestacije u ime načelnika Općine Ilidža prof. dr. Senaida Memića, bili su Muhamed Omerović, dopredsjedavajući Općinskog vijeća i Denis Muhović, vijećnik. Potpisana je, 29. jula 2014. godine i Povelja o bratimljenju dva udruženja, “Sunce na dlanu” Kladanj i “Društva za cerebralnu i dečiju paralizu i plegije” Požege, a prisustvovali su načelnik općine Kladanj, Jusuf Čavkunović i predsjednik opštine Požege Milovan Mićović. Udruženje Sunce na dlanu realizovalo je projekat „Susret djece Bosne i Hercegovine i Srbije” u partnerstvu sa nevladinom organizacijom „Narodna pomoć Francuske”.



## Ručak za članove Udruženja Radost života

U prostorijama MZ Stup II Udruženje Zlatna ruka je, 6. avgusta 2014. godine, upriličilo druženje uz ručak za dvadesetak članova Udruženja Radost života. Bila je to radost za mališane sa posebnim potrebama koji vrlo rijetko imaju priliku da idu u posjete, ali i zadovoljstvo za njihove mame, koje su mogle uz kolače i kaficu bar na trenutak uljepšati svoju svakodnevnicu. “Nije prvi put da nas Udruženje Zlatna ruka poziva u goste, jer naša saradnja traje dugo, a ove vrijedne žene za mališane svake Nove godine obezbijede paketiće. Ovo je pravi doživljaj za naše članove, jer im mnogo znači i najmanji znak pažnje”, kazala nam je Azra Softić, sekretarka Udruženja Radost života.



# Dan mladih općine Ilidža 2014

Tradicionalna omladinska manifestacija Dan mladih općine Ilidža 2014. koju organiziraju volonteri instituta za razvoj mladih KULT održana je u Obrazovno – rasonodnom centru za mlade SPAJALICA na Ilidži. Dan mladih općine Ilidža održava se devetu godinu zaredom a sam događaj već prerasta u tradicionalnu manifestaciju koju prvenstveno podržava Općina Ilidža. Posjeta je zaista bila značajna, posebno nas

raduje što smo okupili najmlađe građane ali i prolaznike koji su zainteresirano pratili program, istakla je voditeljica Obrazovno-razonodnog centra za mlade SPAJALICA – Vesna Filipović. Događaj je objedinio dječji program te sajam NVO ali i odbojkaški turnir za mlade. Kompletnu manifestaciju su organizirali volonteri Instituta za razvoj mladih KULT u svrhu promocije neformalnog obrazovanja za mlade i promocije aktivnosti centra SPAJALICA.



## Održan Festival za mlade “Volonterijada”

Aktivisti Crvenog križa Ilidža i ove godine, uz podršku Općine Ilidža, organizovali su Festival za mlade “Volonterijada”. Ovogodišnji program festivala započeo je 28. augusta.2014. godine turnirom u fudbalu „Volonterac” koji se održao u Prvoj osnovnoj školi, a u nastavku programa festivala organizovani su i turnir u odbojci “Volonterka”, igre bez granica i druženje za učesnike Volonterijade na bazenu RVI, čime se i završio festival. “Volonterijada 2014” je projekat koji ima za cilj promociju volonterizma i aktivizma mladih i koji je kao takav prepoznat i podržan od strane Općine Ilidža i uvršten u Strategiju prema mladima Općine Ilidža do 2017. godine. Ovogodišnja Volonterijada bila je i humanitarnog karaktera, tako da su sredstva za nagrade pobjedničkim ekipama usmjerena na kupovinu školskog pribora za djecu iz socijalno ugroženih porodica, a prvoplasiranim u sve tri discipline uručene su medalje. „Drago nam je i zahvalni smo što nam se pružila prilika da organizujemo ovakav festival gdje se mogu susresti i upoznati volonteri iz različitih organizacija i razmijeniti iskustva”, istakao je jedan od organizatora, predsjednik mladih CK Ilidža Jasmin Nikšić.



## Obilježen šesti rođendan Obrazovno-razonodnog centra za mlade SPAJALICA

Prigodnom svečanošću u svojim prostorijama u prisustvu velikog broja prijatelja i gostiju , Obrazovno-razonodni centar za mlade SPAJALICA proslavio je svoj šesti rođendan. Najzaslužnijim ljudima koji su tokom svih šest godina svesrdno pomagali posebno se zahvalila voditeljica centra SPAJALICA-Vesna Filipović, koja je tom prilikom kazala: „Ponosna sam što je centar

uspio da funkcioniše tokom svih ovih godina u kontinuitetu a za naš uspješan rad zaslužan je kompletan tim koji na najbolji način radi i doprinosi razvoju omladinskog društva u Bosni i Hercegovini.„Spajalica u narednom periodu i dalje ostaje centar za druženje mladih , centar neformalnog obrazovanja u kojem se mladi mogu educirati i dograditi svoje znanje.



## Odbojkašice „Igmana” izborile ulazak u Superligu FBiH

Dobrim igrama i ostvarenim rezultatima u sezoni 2013/2014, seniorke odbojkaškog kluba „Igman” izborile su ulazak u Superligu Federacije BiH, koja će se igrati po proširenom sistemu u dvije grupe. Od ukupno 16 odigranih utakmica, kroz ligaški dio, te polufinalni i finalni turnir ostvarili su 14 pobjeda. U generalnom plasmanu zauzele su treće mjesto i time obezbijedile učešće u višem rangu takmičenja. Sve ostvarene rezultate bilo bi teško postići bez podrške lokalne zajednice i

privrednih subjekata sa Ilidže. Obzirom da u klubu imamo potreban igrački, stručni i organizacijski potencijal, uz dodatnu angažovanost možemo dostići i do Premijer lige BiH, ističu u klubu. „Naredna sezona je veliki izazov za sve u klubu. Nastojat ćemo stvoriti bolje uslove za trenažni proces seniorskog tima, ali i obezbijediti dodatna finansijska sredstva za znatno veće troškove takmičenja u Superligi. Kada sumiramo rezultate ostvarene u protekloj sezoni, možemo reći da su zacrtani ciljevi kluba u potpunosti

ostvareni”, kazao nam je član Upravnog odbora kluba Dino Hadžić. Da se u ovom sportskom kolektivu sistemki radi na unapređenju odbojkaškog sporta obezbjeđujući igračku bazu za budućnost, potvrđuje i rezultat kadetkinja koje su osvojile treće mjesto na federalnom nivou u konkurenciji 32 ženska odbojkaška kluba. Planovi ženskog odbojkaškog kluba „Igman” za ovu godinu je organizovanje Trećeg „Ilidža Volleyball Cup-a” početkom septembra, na kojem će biti obilježena 35. godišnjica ovog kluba.

## Porodiljama od jula povećana novčana pomoć

Prema novom Zakonu o izmjeni zakona o socijalnoj zaštiti, zaštiti civilnih žrtava rata i zaštiti porodice sa djecom koji je donešen 26. juna, a stupio na snagu 27. juna 2014. godine, procenat za naknadu porodiljama se sa 20% povećava na 30%. Sve porodilje sa biroa koje su potrebnu dokumentaciju predale nakon 27. juna 2014. godine dobit će novčanu pomoć u iznosu od 180 KM. Kandidatkinje koje su dokumentaciju predale prije 27. juna 2014. godine, do kraja porodiljske pomoći primat će iznos od 120 KM.

## Pravo na dječiji dodatak za invaliditet veći od 90%

Pravo na dječiji dodatak pripada porodici u kojoj jedan od roditelja ima utvrđen invaliditet od najmanje 90%, izmjena je po novom Zakonu o izmjenama i dopunama zakona o socijalnoj zaštiti, zaštiti civilnih žrtava rata i zaštiti porodice sa djecom. Ostali korisnici koji u porodici imaju jednog od roditelja sa invaliditetom ispod 90% dobili su odbijenice. Po evidenciji Službe za rad, socijalna

pitanja, zdravstvo, izbjeglice i raseljena lica Općine Ilidža, izmjenama ovog Zakona za njih 167 prestalo je pravo na novčanu naknadu. Korisnike, gdje jedan od RVI roditelja ima utvrđen invaliditet od 20% do 80%, kojih ima 343, od jula 2014. godine preuzima Služba za boračka pitanja, u skladu sa Zakonom o izmjenama i dopunama zakona o dopunskim pravima boraca branitelja BiH.

## OBAVJEŠTENJE

Obzirom de je Jedinствeni matični registar Federacije Bosne i Hercegovine u operativnoj funkciji od 30. juna 2014. godine, matični ured Općine Ilidža je od 10. jula 2014. godine počeo sa izdavanjem izvoda iz matičnih knjiga rođenih, umrlih, državljana i vjenčanih za građane koji su upisani u matične knjige drugih općina u Federaciji BiH.



## Održan Košarkaški turnir „Daj koš na jedan koš“

NVO alturista „SVJETLO“ u saradnji sa KK Igman i Udruženjem RVI Općine Ilidža organizovali su košarkaški turnir „Daj koš na jedan koš“ za osobe sa umanjnim sposobnostima. Turnir je održan na parking prostoru na

ulazu u Veliku aleju na Ilidži 26. jula 2014. godine. Ovaj turnir okupio je osobe sa umanjnim sposobnostima iz Zavoda „Drin“ Fojnica, „Nahorevo“ Sarajevo, „Bakovići“, „Pazarić“, Udruženje „Nada“ Rudo i NVO alturista „SVJETLO“, ukupno

oko 50 košarkaša i košarkašica. Organizacijom ovog turnira promoviralo se pravo i potreba socijalne uključenosti osoba sa umanjnim sposobnostima kroz sport. Na svečanom otvorenju nastupio je i Denis Barta, slijepi dječak

koji je odsvirao i otpjevao nekoliko pjesama. Turniru su prisustvovali i košarkaši BiH predvođeni Jusufom Nurkićem. Pobjedničkim ekipama Zavod „Drin“, Zavod „Pazarić“ i NVO alturista „SVJETLO“ obezbijedene su nagrade. Košarkaški turnir se održao u okviru projekta „Komunicirajmo, mi činimo čuda“ koji ima za cilj povećati socijalnu uključenost i vidljivost osoba sa umanjnim sposobnostima u društvo kroz različite aktivnosti (art radionice, edukativne radionice, sport...) te javne događaje koji stvaraju priliku za susret osoba sa i bez umanjnih sposobnosti.

## OBAVJEŠTENJE ZA GRAĐANE MZ STUP, STUP II I OTES

Obavještavaju se građani mjesnih zajednica Stup, Stup II i Otes da je Općinska izborna komisija Ilidža, donijela Odluku o promjeni lokacije biračkih mjesta na Općim izborima koji će se održati u nedjelju 12. Oktobra 2014. godine. Građani MZ Stup iz ulica Pijačna, Joze Penave, Vitomira Lukića, Hifzi Bjelevca, Tvornička, Nikole Šopa, Ismeta Alajbegovića Šerbe i Briješćanska moći će glasati u prostorijama Šeste osnovne škole, ul. Bare kod Stupa br.63. Građani MZ Stup II iz ulica Dobrinjska, Stupska, Smajila Balića, Dr. Ševale Zildžić Iblizović, Kasindolska, Salke Terzića, Davorina Popovića, Dr. Avde Sućeske, Lepenička, Kasindolskih žrtava, Mehmedalije Bojića, Nikole Kolumbića-Šake, 14.maj 92, Džemala Bijedića, Dr. Seida Hukovića, Zdenka Markulja, Fridriha Adolfa, Latička, Dr. Atifa Purivatre, Dr. Ibrahima Tepića i Zuhdije Kadrića će moći glasati u prostorijama IV Gimnazije Ilidža, ul. Mala aleja br.69. Građani MZ Otes iz ulica Barska, Dragana Kulidžana, Trg oteškog bataljona, Oteška, Cap Anamur, Ivana Brkića, Spomenik, Sastavci, Mliništa, Franje Vuletića, Rahima Čatovića, Čitlučka, Fridriha Kacera, Senada Fazlića, Fadila Hadžića, Vjekoslava Klaića, Seada Sinanovića i Terovića moći će glasati u prostorijama Treće osnovne škole, ul. Nasihe Kapidžić Hadžić br.1.



## Program namjenjen za sve dobne skupine

U vremenu današnjeg brzog življenja i stresa, na Ilidži postoji mjesto gdje možete za 60 minuta biti preporođeni. Riječ je o zumba fitness programu, koji je primjeren za sve dobne skupine. Neovisno o tome u kakvoj ste fizičkoj kondiciji, imate li bilo kakvog ili nikakvog iskustva u plesu, bili vi muško ili žensko, zumbu plešu svi i dostupna je svima. Na času zumbе se stvori tako zabavna i vesela atmosfera da je i onima koji se nikad nisu usudili vježbati u grupi ili nikad nisu plesali jer misle da ne znaju, Lejla Pirić, licencirana zumba instruktorka sa dugogodišnjim

profesionalnim iskustvom će srušiti barijere da svi mogu to naučiti. Časovi se održavaju u Prvoj osnovnoj školi u 18 sati ponedjeljkom i četvrtkom i u Multimedijalnoj sali u 20 sati, u saradnji sa Općinom Ilidža. „Kod mene na časove dolaze sve dobne skupine, uporne su u vježbanju i mogu reći imamo rezultata. Tu su uvijek nasmijana lica. Čas započinjemo zagrijavanjem do deset minuta a onda se počnu koristiti osnovni koraci iz plesova, dio od 40 minuta i mogu reći da je najzabavniji, jer prelazimo iz pjesme u pjesmu, a poneke pjesme su i kombinacije više vrsta

ritmova pa time i plesova. Naizmjenično podižemo i spuštamo intenzitet treninga uz različite ritmove, a uz sve to plesni koraci se prilagođavaju kako bi u određenim intervalima više opteretili određene mišićne skupine. Sve se to događa, a da prisutni nisu ni svjesni da vježbaju. Atmosfera je kao na zabavi“ rekla nam je Lejla Pirić. Ako želite da budete dio priče dio atmosfere pridružite im se. Instruktorka Lejla Pirić ljubazno će se javiti putem telefona 061 490 662.

# PREGLED BIRAČKIH MJESTA NA PODRUČJU OPĆINE ILIDŽA ZA OPĆE IZBORE 2014. GODINE

BIRAČKO MJESTO	LOKACIJA I ADRESA BIRAČKIH MJESTA	BIRAČKO MJESTO	LOKACIJA I ADRESA BIRAČKIH MJESTA
131A001	SEDMA OSNOVNA ŠKOLA, Blažuj br.118	131A047	DESETA OSNOVNA ŠKOLA, OSIJEK, Osik br. 52 A
131A002	SEDMA OSNOVNA ŠKOLA, Blažuj br.118	131A048	DESETA OSNOVNA ŠKOLA, OSIJEK, Osik br. 52 A
131A003	SEDMA OSNOVNA ŠKOLA, Blažuj br.118	131A049	DESETA OSNOVNA ŠKOLA, OSIJEK, Osik br. 52 A
131A004	SEDMA OSNOVNA ŠKOLA, Blažuj br.118	131A050	DESETA OSNOVNA ŠKOLA, OSIJEK, Osik br. 52 A
131A005	SEDMA OSNOVNA ŠKOLA, Blažuj br.118	131A051	DESETA OSNOVNA ŠKOLA, OSIJEK, Osik br. 52 A
131A006	SEDMA OSNOVNA ŠKOLA, Blažuj br.118	131A052	DESETA OSNOVNA ŠKOLA, OSIJEK, Osik br. 52 A
131A007	SEDMA OSNOVNA ŠKOLA, Blažuj br.118	131A053	TREĆA OSNOVNA ŠKOLA, PEJTON, Nasihe Kapidžić Hadžić br. 1
131A008	SEDMA OSNOVNA ŠKOLA, Blažuj br.118	131A054	TREĆA OSNOVNA ŠKOLA, PEJTON, Nasihe Kapidžić Hadžić br. 1
131A009	SEDMA OSNOVNA ŠKOLA, Blažuj br.118	131A055	TREĆA OSNOVNA ŠKOLA, PEJTON, Nasihe Kapidžić Hadžić br. 1
131A010	OSMA OSNOVNA ŠKOLA „AMER ČENANOVIĆ“, Ilirska br. 2	131A056	TREĆA OSNOVNA ŠKOLA, PEJTON, Nasihe Kapidžić Hadžić br. 1
131A011	OSMA OSNOVNA ŠKOLA „AMER ČENANOVIĆ“, Ilirska br. 2	131A057	TREĆA OSNOVNA ŠKOLA, PEJTON, Nasihe Kapidžić Hadžić br. 1
131A012	OSMA OSNOVNA ŠKOLA „AMER ČENANOVIĆ“, Ilirska br. 2	131A058	TREĆA OSNOVNA ŠKOLA, PEJTON, Nasihe Kapidžić Hadžić br. 1
131A013	OSMA OSNOVNA ŠKOLA „AMER ČENANOVIĆ“, Ilirska br. 2	131A059	DEVETA OSNOVNA ŠKOLA, RAKOVICA, Rakovička cesta br. 339
131A014	OSMA OSNOVNA ŠKOLA „AMER ČENANOVIĆ“, Ilirska br. 2	131A060	DEVETA OSNOVNA ŠKOLA, RAKOVICA, Rakovička cesta br. 339
131A015	OSMA OSNOVNA ŠKOLA „AMER ČENANOVIĆ“, Ilirska br. 2	131A061	DEVETA OSNOVNA ŠKOLA, RAKOVICA, Rakovička cesta br. 339
131A016	OSMA OSNOVNA ŠKOLA „AMER ČENANOVIĆ“, Ilirska br. 2	131A062	DEVETA OSNOVNA ŠKOLA, RAKOVICA, Rakovička cesta br. 339
131A017	OSMA OSNOVNA ŠKOLA „AMER ČENANOVIĆ“, Ilirska br. 2	131A063	PETA OSNOVNA ŠKOLA, S. KOLONIJA, Umihane Čuvidine br. 58
131A018	ČETVRTA OSNOVNA ŠKOLA, Put Famosa 33	131A064	PETA OSNOVNA ŠKOLA, S. KOLONIJA, Umihane Čuvidine br. 58
131A019	ČETVRTA OSNOVNA ŠKOLA, Put Famosa br. 33	131A065	PETA OSNOVNA ŠKOLA, S. KOLONIJA, Umihane Čuvidine br. 58
131A020	ČETVRTA OSNOVNA ŠKOLA, Put Famosa br. 33	131A066	PETA OSNOVNA ŠKOLA, S. KOLONIJA, Umihane Čuvidine br. 58
131A021	ČETVRTA OSNOVNA ŠKOLA, Put Famosa br. 33	131A067	PETA OSNOVNA ŠKOLA, S. KOLONIJA, Umihane Čuvidine br. 58
131A022	ČETVRTA OSNOVNA ŠKOLA, Put Famosa br. 33	131A068	PETA OSNOVNA ŠKOLA, S. KOLONIJA, Umihane Čuvidine br. 58
131A023	ČETVRTA OSNOVNA ŠKOLA, Put Famosa br. 33	131A069	PETA OSNOVNA ŠKOLA, S. KOLONIJA, Umihane Čuvidine br. 58
131A024	ČETVRTA OSNOVNA ŠKOLA, Put Famosa br. 33	131A070	PETA OSNOVNA ŠKOLA, S. KOLONIJA, Umihane Čuvidine br. 58
131A025	DRUGA OSNOVNA ŠKOLA, HRASNICA II, Školska br. 1	131A071	PETA OSNOVNA ŠKOLA, S. KOLONIJA, Umihane Čuvidine br. 58
131A026	DRUGA OSNOVNA ŠKOLA, HRASNICA II, Školska br. 1	131A072	PETA OSNOVNA ŠKOLA, S. KOLONIJA, Umihane Čuvidine br. 58
131A027	DRUGA OSNOVNA ŠKOLA, HRASNICA II, Školska br. 1	131A073	PETA OSNOVNA ŠKOLA, S. KOLONIJA, Umihane Čuvidine br. 58
131A028	DRUGA OSNOVNA ŠKOLA, HRASNICA II, Školska br. 1	131A074	MZ STUPSKO BRDO, Dr. Kasima Begića br. 111
131A029	DRUGA OSNOVNA ŠKOLA, HRASNICA II, Školska br. 1	131A075	MZ STUPSKO BRDO, Dr. Kasima Begića br. 111
131A030	DRUGA OSNOVNA ŠKOLA, HRASNICA II, Školska br. 1	131A076	ŠESTA OSNOVNA ŠKOLA, STUP, Bare kod Stupa br. 63
131A031	DRUGA OSNOVNA ŠKOLA, HRASNICA II, Školska br. 1	131A077	ŠESTA OSNOVNA ŠKOLA, STUP, Bare kod Stupa br. 63
131A032	DRUGA OSNOVNA ŠKOLA, HRASNICA II, Školska br. 1	131A078	ŠESTA OSNOVNA ŠKOLA, STUP, Bare kod Stupa br. 63
131A033	PRVA OSNOVNA ŠKOLA, ILIDŽA, Mala aleja br. 15	131A079	ŠESTA OSNOVNA ŠKOLA, STUP, Bare kod Stupa br. 63
131A034	PRVA OSNOVNA ŠKOLA, ILIDŽA, Mala aleja br. 15	131A080	ŠESTA OSNOVNA ŠKOLA, STUP, Bare kod Stupa br. 63
131A035	PRVA OSNOVNA ŠKOLA, ILIDŽA, Mala aleja br. 15	131A081	ŠESTA OSNOVNA ŠKOLA, STUP, Bare kod Stupa br. 63
131A036	PRVA OSNOVNA ŠKOLA, ILIDŽA, Mala aleja br. 15	131A082	ŠESTA OSNOVNA ŠKOLA, STUP, Bare kod Stupa br. 63
131A037	PRVA OSNOVNA ŠKOLA, ILIDŽA, Mala aleja br. 15	131A083	ŠESTA OSNOVNA ŠKOLA, STUP, Bare kod Stupa br. 63
131A038	PRVA OSNOVNA ŠKOLA, ILIDŽA, Mala aleja br. 15	131A084	ČETVRTA GIMNAZIJA, ILIDŽA, Mala aleja br. 69
131A039	PRVA OSNOVNA ŠKOLA, ILIDŽA, Mala aleja br. 15	131A085	ČETVRTA GIMNAZIJA, ILIDŽA, Mala aleja br. 69
131A040	TREĆA OSNOVNA ŠKOLA, Nasihe Kapidžić Hadžić br. 1	131A086	ČETVRTA GIMNAZIJA, ILIDŽA, Mala aleja br. 69
131A041	TREĆA OSNOVNA ŠKOLA, Nasihe Kapidžić Hadžić br. 1	131A087	ČETVRTA GIMNAZIJA, ILIDŽA, Mala aleja br. 69
131A042	TREĆA OSNOVNA ŠKOLA, Nasihe Kapidžić Hadžić br. 1	131A088	ČETVRTA GIMNAZIJA, ILIDŽA, Mala aleja br. 69
131A043	TREĆA OSNOVNA ŠKOLA, Nasihe Kapidžić Hadžić br. 1	131A089	ČETVRTA GIMNAZIJA, ILIDŽA, Mala aleja br. 69
131A044	TREĆA OSNOVNA ŠKOLA, Nasihe Kapidžić Hadžić br. 1	131A090	ČETVRTA GIMNAZIJA, ILIDŽA, Mala aleja br. 69
131A045	TREĆA OSNOVNA ŠKOLA, Nasihe Kapidžić Hadžić br. 1	131A091	ČETVRTA GIMNAZIJA, ILIDŽA, Mala aleja br. 69
131A046	DESETA OSNOVNA ŠKOLA, OSIJEK, Osik br. 52 A	131AS01NN	PRVA OSNOVNA ŠKOLA, ILIDŽA, Mala aleja br. 15